

QUÆSTIO MEDICA, 158

Cardinalitiis Disputationibus manè discutienda in Scholis Medicorum, die Jovis 14 Martii 1720.

M. JOANNE HERMENT, Medico Regis ordinario;
Doctore Medico, Præside.

An post cibum fumus tabaci?

I.

URBANIS & studio deditis frequens est stomachi imbecillitas: frequentius adhuc deliciarum patrocinium in accusationem stomachi non merentis, quæsitum. Tardè concoquunt aut ingesta copiosiora, vel prava coquere non possunt, præcordia inflantur, noctu sitiunt, non dormiunt, aut non placidè, cibibus acefcit & appetentia languet; perindè est multis. In ventriculo invehuntur & remedium quærunt hebeti ventriculo, abhorrent ab inediâ, à frugalitate, aquam abominantur, & edulia simplicia, facilè parabilia & à ventriculo facilè superanda. Hæc tamen forsan laudant aliquandò, sed in usum non admittunt. Malunt morbum quem insimulent; sæpissimè faciunt, foveant, augment. Monendi tamen vel importunè. Bonum est quod naturale. Ventriculus sibi & corpori universo victum prospicit & parat. Si in functione deliquerit, non sarcitur commissum. Ut non peccet animadvertendum. Norma est recta & maximè naturalis administratio. Opus exigendum pro roboris ratione, nec nimium, nec operosius. Impedimenta removenda, quæ ferè omnia ad plenitudinem redeunt. Quod solus ventriculus potest, sinendum ut faciat. Igitur ingesta arctè complectitur, nec vacuum relinquit locum, quàmlibet exiguum sit, quod in se continet. Ab omni aliâ re quiescit dum vacat coctioni. Quævis passio actionem interturbat. Motus vehemens corporis, animi perturbatio, dolor, febris, coctionem frustrantur. Moliris intensiorem virtutem, quæ fit cum alteratio ciborum non est naturalis, ideòque imperfecta aut prava. Stimulum addis? deferere cogis inceptum, quod non impunè intermittitur. Una est ciborum alteratio proficua, quæ in chylum nutriturum, dulcem, pinguem, substantiæ mediocris & æqualis terminatur; talem non obtinebis unquam à vehementiâ, sed ab æquabilitate, non à remotione rerum inservientium, sed opportunâ adhibitione; ab organo liberè agente, necessaria admittente, non superfluis obruto.

QUÆSTIONEM moves de superfluo, de deficiente, de organo spontè agente & excitato, stimulo adhibito; de necessariis admittendis, rejiciendisque superfluis. Addis, Medicus officium est detractio redundantium, adjectio deficientium? Benè, si opportunè. Audi: finis Medicinæ est conservatio sanitatis præsentis, absentis restitutio, salubre ad aliud refertur, quod sanum cupimus. In eo causa est vel signum sanitatis. Totum corpus simul respicit, vel magis propriè partem determinatam. In ventriculi coctione, totum agit corpus, ideòque prodest quod totum juvat: peculiaris est ventriculi functio, nulla ferè pars totum magis afficit & à toto magis patitur: omnibus sympathiæ causis obnoxius, sive absolutis, ut sunt substantiæ similitudo, societas operis, communitas vasorum, connexio, vicinia: vel privantibus ut influxus negatio, prohibitus effluxus, motus compressus & extimulatus. Signum est salubre constans, si pari ratione appetatur & coquatur, atque vicissim. In ipsa actione facilis est rei salubris tolerantia & ab ea solatium; post actionem, infirmitatis extinctio, restitutio sanitatis; vegetum corpus functiones bellè exequitur. Cave, credas ab evacuatione copiosâ melius futurum, aut à laboriosâ corporis concussione. Turbatur corpus ab insalubribus, vexantur partes, functiones interpellantur. Si contingat, ut quid simile sit moliendum, id quasi per transfennam, ut ab onere liberetur corpus & sibi reddatur, nec quantum vacuatum fuerit animadvertendum, sed quale, scilicet nocens aut nocivum.

III.

SI dubites an fumus tabaci functiones inturbet & vexet partes; considera quid sit & quid præstet. Tabacum sive petum & nicotiana sulphure abundat & sale volatili acerrimo. Adeò vehemens est ejus oleum ad vomitum ciendum, ut naribus subjectum cogat evomere, ipsa aqua stillaritia vomitum provocat. His non uteris quæ sibi reddita & libera à suis compedibus, potentiora sunt? Sed fumus eadem continet & ex iisdem constat non omninò compactis. Magnas virtutes prædicas? Sunt revera: sed quæ magna est virtus extremo propior est, nec sine cautela adhibenda. Extrema extremis reservantur. Quocumque modo adhibeas tabacum, nihil mediocre expecta. Viride admotum potenter resolvit, tritum, vehementius: exusti cinis causticus carnes exedit putridas & chironia sanat ulcera. Siccum naribus inditum membranam convellit, ut non solum mucus exprimatur quasi sollicitatus, sed serum fundatur ut in corysâ. Folii frustulum ore contineatur, vel fumus è fistulâ excipiat, salivæ ductus, glandulæ maxillis appo-

fitæ maximam vim salivæ evomunt, & successivâ torturâ pulmo viscosam pituitam exprimit è larynge & trachæâ arteriâ, è gula, æsophago non minus extrahitur. Ventriculum subvertit & nauseam vomitumque ciet. Assuetos habet mitiùs: at defluentis pituitæ copia eundem ventriculum inundat, è toto corpore sudorem pellit & simul alvum deturbat. Elixatum & jus clystere injectum non modò per alvum purgat, sed & per vomitum, horrendaque parit symptomata. Quod damni non affert saliva, si eo fumo conspurcata in ventriculum impluat. Lactea vasa subit & in sanguinea deferet sales acerrimos & sulphur narcoticum. Enimverò, venenum laudas cùm sævit in præcordiis, conspicuum cardialgiâ, nausea & vomitu diro. Cum molesta vertigo quaslat ebrium caput, cùm suffusio tenebricosa instantem mortem prænuntiat.

IV.

SCILICET venenum est. Venenum intelligitur, quod sub parva mole corpus humanum diversâ ratione lædere potest. Nihil obstat quominus idem venenum audiat & remedium strenuum at periculosum. Quod in tabaco & ejus excepto fumo vehementius est quàm ferri possit aut debeat, illud idem commendat & nocet. Primus hausti fumi effectus est nervosarum partium concussio. Secundus est, & à primo pendet, ebrietas, vertigo, spasmus universus expressionis succorum & humorum corporis causa. Undè per accidens, levamen: necessariò contingit partium lapsus, ruina. In juventute firma stamina, constans structura, & inde inculpara sanitas, validumque robur sustinent impetum. Quæ ab eo attritio nervorum, perversio, depravatioque functionum edocent brevè, quæ quasi senes circumveniunt incommoda. Fugit frontis honor, victa membra, languet appetitus, viscera fatiscunt, arthritis contundit articulos, caput infirmum, gelidè quidvis senex timidèque ministrat. Tot ubique ruinis concidentibus, sanguini intercluditur iter ut brevior in dies illius circuitus, tandem omninò cum calore desinat. A cibo fumus haustus non adeò vehementer quatit nervos, sed magis officit digestionis totique corpori labem inurit contumaciorem, ut cæteræ partes, ventriculus, & reliquis fortius, percellitur. Cibos non benè coctos ejicit, expressa per vim pituita permiscetur, atque, ut fit in commotione vehementi, partes emittunt quæ servanda tradiderat natura, accipiunt, quæ ordine constituto vetuerat, ut susciperent. Hostis penetrabilia subit. Sic erat tanta cura in ciborum copiâ & delectu. Dicam quod res est, vetus erat crapula & novæ desiderium. Hæ fumi delicia, hoc lenocinium. Venenum est, sed venenum cupiditatis servit. Proditor placet in animi perturbationibus. Corpus

chylo veteri plenum & infarctum respuit de novo apposita; locus non suppetit; fit via vi, rumpunt aditus & claustra viarum.

V.

ALIMENTORUM necessitas, vini præstantia, in eduliis euechymis, substantiæ similitudo & benigna qualitatum temperies decipiunt nos. Nimiâ quantitate succi, optimi licet, oppressi jacemus inter frugalitatis encomia. Nullus intra necessitatis & naturæ limites dietam conservat. Jugulant nos artes ad vitam conservandam & beatiorem reddendam excultæ. Chylus ex præcedenti cibatione in sanguine residuus, vel in glandulas vasave excretoria amandatus, ob vitæ mollietatem restitat, exercitio excutiendus. Aër in eo compressus, sed calore corporis & irrequietâ cordis pulsatione valdè rarefactus, fibras omnes & organa torquet. Sensus & consuetudo novum chylum sollicitant ad leniendam ægritudinem & libertatem obtinendam chyli veteris, facti viscidioris. Hic est crapulæ sensus. Malum malo sæpè metuendo magis, pellitur. Fumus tabaci adhibetur ad crapulam solvendam, potentissimè solvit, sed damnum infert nervis, quorum fibras dimovet à situ & mutat figuram naturalem, motum inducit alienum. Functiones pervertit; titillatio in ægritudine tam gratâ, epilepsia est primùm levis, sed usu continuato crescit, & fatiscente familiâ nerveâ, fatigatis cerebri membranis, ex convulsivo motu fit convulsio, succedit epilepsiæ, paralytis & apoplexia. Cætera viscera sua damna patiuntur. Longè à naturæ proposito absunt, qui post cibum fumum hauriunt, juvare credunt ventriculum in excoquendo cibo, & turbant in opere. Coctionem sperant perfectiorem & præter imperfectum chylum, colluviem pituitosam inferunt in vasa lactea & sanguinea; hoc unum obtinent ut perdant partem chyli quam totis votis exoptabant sibi ex præstantioribus eduliis, spe duplici falsi, decepti luxuriâ.

Non ergò post cibum, fumus tabaci.

Proponebat Parisiis PETRUS MALOET, Claromontanus
apud Arvernos, Baccalaureus Medicus, A. R. S. H. 1710.